

REGIONAL NEWS

HEADLINES:-

1. Faina chungchang inhrilhhriatna leh faina kawnga tam thei ang ber thawk chhuak tura hmalakna Swachhata Hi Seva 2024 chu vawiin khan Mizoramah kalpui tan a ni.
2. Mizoram Oil Tanker Driver Association (MOTDA) leh Petroleum Entrepreneurs' Transport Union of Mizoram (PETUM) te chuan Kawngpui chhia avanga lirtheite tana chetsual hlauhawm an tih avangin vawiin atang khan pawl pahnih hnuaiia lirtheite an tlan lo.
3. Prime Minister Modi-a sawrkar term thumna ni 100 chhungin Prime Minister Employment Generation Programme (PMEGP) hnuaiiah loan cheng vaibelchhe sang thum za leh 48 pek chhuah tawh a ni.
4. Aam Aadmi Party chuan party hruaitu Atishi chu Delhi Chief Minister thar atan an ruat.

<><><>

SWACHHATA SEVA

Faina chungchang inhrilhhriatna leh faina kawnga tam thei ang ber thawk chhuak tura hmalakna Swachhata Hi Seva 2024 chu vawiin khan ramchung hmun dangte rualin Mizoramah kalpui tan a ni.

Swachhata Hi Seva 2024 hi September ni 14 atanga October ni 1 inkarah kalpui a ni dawn a, Aizawl ah chuan Home Minister Pu K. Sapdanga ho in faina kawnga thawkchhuah tura thutiam sawirualna Swachhata Pledge MYC Auditorium ah neih a ni a, hetah hian New Capital-a thawktu hrang hrang leh sawrkar mi pawimawh te an tel a ni.

Home Minister Pu K. Sapdanga chuan faina a pawimawh zia sawiin mi tinte faina lam kawnga hma lak theuh a pawimawh thu a sawi a. Faina chu beihpui thlak hun chhung chauha kalpui mai lo in, beihpui thlak thin chu a kamkeu-na leh khuh hawna chauhah ngaiin, engtik lai pawha fai reng tur a ni a ti a, fai reng theih nan mimal, pawl leh department te tun aia nasa lehzuala tan la turin a sawm a ni.

Kumin Swachhta Hi Seva thupui atan Swabhav Swachhata-Sanskaar Swachta tih chu thupui a hman a ni a, Swachhata Hi Seva hi sorkar laipui hmalakna hnuaiiah, Swachh Bharat Mission kum 10 tlin pualin September ni 17 atanga October ni 2, Gandhi pianchampha thleng kalpui tur a ni a, hemi hun chhung hian Faina leh Thianghlimna beihpui thlak tur niin, Mizoramah pawh District khawpui bakah notified town leh thingtlang khua zawng zawngah Faina Beihpui thlak a ni dawn a, vawiina hawna hun neih zawh hian Minister hoin Faina Hnatlang neih zui a ni bawk a ni.

Faina kawnga thawkchhuah tura hmalakna hi District hrang hrangah pawh neih niin Hnahthial District ah chuan Bawrhsap Pi Rita Lalnunmawii Pachuau kaihhruaiin hun hman a ni a, Bawrhsap chuan faina beihpui neih turah mi tin an pawimawh thu leh faina chu mi tin kutah a inngah thu a sawi.

Serchhipah chuan DC Pu Paul L.Khuma hova hman niin DC chuan Ram bal leh tawp, rimchhia leh tenawm tih hi foreigner ten India ram an hmuh thin dan a ni a, chu chu thlak danglam tumin Prime Minister

Narendra Modi chuan nasa takin a bei a, ram pumah faina beihpui kawng hrang hrangin kalpui reng a ni ati a, Lawngtlai ah chuan Zirna in leh Kohhran Office hrang hrangah Swachhata Pledge (Faina kawnga thu intiamna) sawirualna neiin khuhhawn a ni a, Swachhata Hi Seva 2024- hawna pual hian Sawrkar Office, Zirna in leh Kohhran Office thenkhatah faina hnatlang thawh chhonzawm a ni a, Lai Womens' Association (LWA) Branch hrang hrang leh Village Council - te huaihawtin Lawngtlai khawpui chhunga veng hrang hrangah faina hnatlang thawh a ni bawk.

Siaha District ah chuan Bawrhsap Pisa tual zualah hman a ni a, Addl DC Pu Abraham Beirazi Khithie chuan Swachhata Hi Seva puala hmalakna tur awm te a tarlang a, a hlawhtlinna chu mipui kutah a awm a, khawtlang a fai theih nan chuan inhhung khur a fai phawt a ngai tih a sawi.

Mamit ah chuan Bawrhsap Pu Jacob Lalawmpuia hoa hman a ni a, DC chuan kalkhawmte chungah lawmthu sawiin, India ram pumpuia India hnampa Mahatma Gandhi piancham pha phak puala faina beihpui thlakna Swachh Bharat Diwas kaltlangin hmalakna kalpui a ni a ti a ni. Swachhata Hi Seva pual hian Akashvani Aizawl ah pawh Akashvani Aizawl Director leh Cluster Head Pu DR Lalropuia hovin faina thutiam an chham rual a, October ni 1 thleng Mizoram hmun hrang hrangah hemi pual hian hun hman a ni dawn a ni.

<><><>

TAXATION DEPT

Taxation Department chu Mizoram Sawrkar hnuaiia Department atanga paih a, Taxation hi Department hrang anga awm tawhlo in Finance Department hnuaiia a awm tawh dawn a ni.

Hemi chungchanga Governor thuchhuah tarlan danin Taxation Department a hranga awm thin chu paih a ni a, a changtu Minister Dr Vanlalhlana enkawl Dept atang pawhin paih a ni.

Taxation Department paih chungchangah hian Chief Minister Pu Lalduhoma chuan Assembly thutkhawm hnukung berah khan Taxation Department chu tuna a awmdan ang tho in tih danglam loh in Finance Department hnuaiia a awm tawh dawn a ti a, a pisa leh thawktute pawh sawi danglam an ni lo ang a ti.

Chief Minister chuan 16th Finance Commission atana inbuatsaihnaah Finance Department in Cell dina hmalak an tumna ah Taxation Department a tel theih loh avangin sum lakluhna tura ruahmanna siam turah department hrang anga thawh tawn chu hun sen ral na mai anih bakah harsatna neuh neuh a awm thin a ti a, department khat hnuaiia an awm chuan awlsam zawk leh chak zawka hnathawh ani thei dawn tih a sawi a ni.

<><><>

COMMERCIAL VEHICLE UNION

Vantlang phur leh ei leh in phur lirthei pawl hrang hrang 12 intelkhawmna Mizoram Commercial Vehicle Union chuan tuialhthei man sang avangin an hna an thawh theih loh thu Taxation Minister Dr Vanlalhlana hnenah vawin khan an thlen a,

Mizoram Commercial Vehicle Union hruaitute hnen atanga kan corr thudawn danin Mizorama tuialhthei man sang avang hian nawrh an tum ni lovin an tan hlawkna a awm tak loh avangin din rih mai an ngai dawn a ni an ti a ni.

Tuialhthei man sang avang hian an rate an san a ngai dawn a, ran an pun chuan mipuiin an tuar dawn si a, hei hi an ngaingamlo tih an sawi a, Truck hian Bairabi railhead atanga Lawngtlai thlen nan disel lit 450 vel a mamawh a, chutah cheng 8 dawna oil man a pun chuan hlawh an nei dawn lova, an tlan thei tawh dawn lo an ti a ni.

Puan tawh angin, Mizoram sawrkar chuan Sept thla atanga hman tan turin petrol leh Diesel-a chhiah a lak thin a ti pung a.

Taxation Department chuan thuchhuah siamin Mizoram sorkar chuan petrol leh diesel-a value added tax (VAT) a lak thin a tisang tih a tarlang a, Social Infrastructure & Services Cess leh Road Maintenance Cess a la dawn tih a tarlang bawk.

August 30-a thuchhuah a siamah diesel-a chhiah 5.23% lak thin chu 10%-ah tihsan a n tih leh petrol-a chhiah 16.36% a lak thin chu 18%-ah tihsan a ni tih tarlan a ni a, perol leh diesel-ah hian Social Infrastructure & Services Cess Rs. 2 leh Road Manintenance Cess Rs. 2 lak a ni dawn tih tarlan a ni.

<><><>

NH 54 ROAD

Mizoram Oil Tanker Driver Association (MOTDA) leh Petroleum Entrepreneurs' Transport Union of Mizoram (PETUM) te chuan Kawngpui chhia avanga lirtheite tana chetsual hlauhawm an tih avangin waviin atang khan pawl pahnih hnuaiia lirtheite an tlan lo.

MOTDA leh PETUM hruaitute chuan kar kalta inrinni khan Aijal Club ah Jt meeting an nei a, hemi tuma an rel danin, Mizorama Kawngpui, a bikin Kawnpui leh Sairang inkar Kawngpui chu Tuialhthei phur lirtheite tan chetsual hlauhawm khawpin a chhe mek a. Kawng chhia a tlan hian Petrol leh Diesel baw palh in chhiatna nasa tak a thlen theih avangin waviin atang khan Tuialhthei phur te chu tlan rihloh nise, an tih angin Mizoram a lo lut tur lirtheite pawh tlan lui lo turin an ngen a, hei hian lirthei dangte a huam loh thu an sawi.

Hriat theih chinah waviin hian phailam atangin Mizoram ah Tuialhthei phur lirthei an rawn lut lo a ni.

Waviin khan PWD Minister Pu Vanlalhlana pisaah Mizoram Truck Owners Association (MTOA) leh Mizoram Truck Drivers Association (MTDA) hruaitute an inkawm a. Deputy Speaker leh Kolasib bialtu ni bawk Pu Lalfamkima chuan a telpui a ni.

He hunah hian MTOA leh MTDA ten Kawnpui-Khamrang kawng chhia avanga harsatna an tawh te sawiin, tun aia chak zawka kawng siam a nih theih dan te an sawi a. A bul tan nan naktukah Minister hovin MTOA leh MTDA hruaitute nen a hmun ngeia enfiah an rel nghal a ni.

Hetihlai hian, Kolasib CMO hmalaknain Kawnpui leh Sairang inkar-Tuitun leh Khamrang khaw inkara Kawng chhia avanga lirthei tangkhang mek khalhtu te zun leh ek thiarna hmun leh an hriselna dinhmun endik sak anni.

Lirthei khalhtute hriselna dinhmun an endikna ah hian damlo enkawl ngai leh damdawi pek ngai hmuh a ni lova, Malaria laka an him nan thosilen a thlawnin pek anni. Medical staff te hian Driver te inthiar dan te zawt fiah in,natna inkai darhna kawngah harsatna a thlen loh nan, lei lai khuar ah inthiar in, lei in vur leh zel tura hriattir anni a. Medical staff te hian hriselna kawngah zirtirna an pe nghal bawk.

Driver tangkhangte dinhmun enfiahna ah hian Kolasib CMO office atangin Health Supervisor pahnih leh Health Worker pathum an kal a ni.

Supply Department chuan Mizoram chak lakna kawngpui chhia avanga mipui mamawh hrang hrang phurhluh khaihlak deuh mahse mipuite chia lo turin an ngen a ni.

Food, Civil Supplies & Consumer Affairs department Director chuan nimin khan thuchhuah siamin, rokhawlhna avanga Oil phurh luh a khaihlak chhungin mipuite chia lo turin a ngen a, PWD ten theihtawp chhuahin kawng siam that hna an thawh mek thu leh siam that thuai beisei a nih thu a sawi a, Petrol Pump ten Oil pek chhuah dan tur thupek awm sa an zawm that zel a tul thu leh lirthei a thun bak chu bur hmanga pe chhuak lo turin a ngen nawn a, mipuite pawhin harsatna hrethiam a, mahni lirthei a thun theih bak la khawm lo turin a ngen bawk a ni.

<><><>

CM

Chief Minister Pu Lalduhoma'n, kalphung tharah Project kawng bo awm lovin, a hmang tangkai tur te hnen thleng ngei zela hna thawh tur a ni a ti.

Chief Minister hian a bial chhung Thenzawla Mizoram Handloom Export Facilitation Hub ah IOT Device Deployment a hawannaah he thu hi sawiin Chief Minister chuan, Project kawng bo awm lova, a hmang tangkai tur te hnen thleng ngei zela hna thawh tur a nih thu leh, Project ziaktute pawhin Mizoram mipuite mila project an ziah thiam a pawimawh a ti a, ZOHANDCO tih chak bakah NEHDC leh agency dang tangkai turte kuangkuaah chung a kal zel tum a ni a ti bawk.

He hunah hian Industries Minister Pu F. Rodinglana chuan Chief Minister a tawiawm a, IOT Device hi internet thiamna hmang tangkaia Puan leituten an puan lei chanchin awlsam taka an hriat theihna tur hmalakna a ni a, an puantahah QR code scan tur a awm ang a, hetah hian a tahtute, a tahna hmun leh thil pawimawh dang awlsam takin a en theih a ni.

<><><>

INDIGO FLIGHT

Chief Minister Pu Lalduhoma kaihruaina hnuaia GAD Civil Aviation Wing leh Ministry of Civil Aviation te hmalakna angin IndiGo Airline chuan Delhi - Aizawl inkara an thlawhna thlawk zat kar khata vawi 5 ni thin chu vawi 10 ah an tipung dawn.

Thla thar October ni 5 atanga kalpui tan tur a ni a. Delhi _ Aizawl thlawhna hi nitin a thlawk dawn a, Nilaini, Zirtawpni leh Pathianni ah chuan vawi 2 a thlawk dawn a ni.

<><><>

PMEGP

Prime Minister Modi-a sawrkar term thumna ni 100 chhungin Prime Minister Employment Generation Programme (PMEGP) hnuaiah loan cheng vaibelchhe sang thum za leh 48 pek chhuah tawh a ni. New Delhi-a chanchinbumite kawmin Union Minister for Micro Small and Medium Enterprises (MSME), Jitan Ram Manjhi chuan he thu hi sawiin PMEGP hnuaiah hian Micro enterprise sing 2 leh sang 6 siam tharin hna thar nuai 2 leh sing khat siam belh tawh a ni a ti a. MSME chu ram eibar zawna bulpui pawimawh tak a ni a tih sawiin ram sum dehchhuah GDP zaa 30 a thawh a ni a ti.

<><><>

DELHI CM

Aam Aadmi Party chuan party hruaitu Atishi chu Delhi Chief Minister thar atan an ruat. AAP Legislature Party thukhawm chuan Atishi hi Chief Minister thar atan an thlang a. City Minister Gopal Rai chuan Assembly inthlan leh hma chu Atishi hi Delhi Chief Minister atan lungrual takin an pawm tih a sawi a. AAP chuan Assembly inthlan hi kumin October leh November thla chung ngeia neih an duh thu a sawi a. Pu Rai-a chuan BJP chu AAP tihchhiat tumah a puh bawk a ni.

Hetihlai hian Delhi Chief Minister nilai Arvind Khejriwal chuan a banna a thehlut tawh a. Pu Khejriwal-a hian vawiin tlai khan Delhi Lieutenant Governor V.K Saxena hmuin a banna hi a thehlut a ni.

<><><>

EUROPE FLOOD

Central leh Eastern Europe-a tuilian avangin mi 18 an thi tawh. Poland - ah tuilian avanga chhiatna thlengah mi pali an thi a. Thla khat chung chu khuarel chhiatna thlengah puan a ni tawh a. Sipai 5000 chuang chhanchhhuah hna thawk tura tirhluh an ni.

Romania ah pawh mi pasarih tuilian avangin an thi a. October ni 16 thleng state of emergency puan a ni.

Czech Republic ah pawh tuilian avangin mi pathum an thi a, mi 13,000 chuang hmun himah thiarchhuah an ni a. Hamrchhak hmun hnihah state of emergency puan a ni bawk.

Hei bakah hian Austria-ah tuilian avangin mi pali an thi a, chenna in sang chuangin kawlphehtha leh tui an tlachham tawh a ni.

Slovakia leh Hungary ah River Danube chim chin a sang zel a, hlauhawm chhinchhiahna a pel tawh a ni.

<><><>